

29 December. 2025

समे .18:15 Hrs

<><><><><><>

### Headlines

- लेफ्टिनेंट गवर्नर मनोज सिन्हा होरें जम्मू दौरे पर आए दे 2025 बैच दे आई.ए.एस सखेत्तरू अधिकारिएं कन्नै गल्लबात कीती।
- नमें ब'रे आले जश्न शा पैहले जम्मू खित्ते ते खास करियै बड़ी सैलानी थाहें पर सुरक्षा बंदोबस्त तगड़े करी दित्ते गे न।
- जम्मू च अज्जै थमां 17मीं जूनियर रोल बॉल राश्ट्री प्रतियोगिता शुरू-मुख भरै थमां 600 शा मते खड्डारी एह्दे च हिस्सा लै करदे न।
- उत्तर भारत दे केई इलाकें च घनी धुंध दा प्रकोप जारी-ब्हार्ड ते रेल सेवाएं पर माड़ा असर पेआ ऐ। 64 डुआरियां रद्द।
- जम्मू-कश्मीर च कल्लै थमां मौसम च बदलाव दे असार न। मौसम विभाग ने प्रदेश दिए बक्ख-बक्ख थाहें पर हौली बरखा ते बर्फवारी दी पेशगोई कीती ऐ।

<><><><><><>

### LG-IAS Trainees

लेफ्टिनेंट गवर्नर मनोज सिन्हा होरें भारत दर्शन प्रोग्राम दे तैहत जम्मू दे 2025 बैच दे आईएएस सखेतरू अधिकारिएं कन्नै अज्ज गल्लबात कीती। इ'नें अधिकारिएं गी मसूरी दी लाल बहादुर शास्त्री नेशनल अकैडमी ऑफ एडमिनिस्ट्रेशन च पैहले चरण दी सिखलाई दित्ती जा'रदी ऐ। एल.जी होरें अज्ज इ'नें सखेत्रु अधिकारिएं कन्नै गल्लबात करदे होई शासन ते सार्वजनिक सेवा दे बारै च अपने माहिराना बिबचार सांझे कीते। उ'नें बक्ख-बक्ख खेत्तरें च जम्मू-कश्मीर दी बदलाव जात्तरा पर बी लोऽ पाई। इ'नें आई.एएस सखेत्तरू अधिकारिएं दे जम्मू दौरे दरान श्री माता वैश्वो देवी तीर्थ स्थान, सलाल पनबिजली परियोजनां, बड़ी ब्राह्मणा आले सिडको औद्योगिक इलाके, भारत-पाकिस्तान बन्ने ते जम्मू शैल्ला दे दौरे पर जाने दा बी कार्यक्रम ऐ।

<><><><><><>

## New Year Arrangements

नमें ब'रे आहले जश्र कोला पैहले खित्ते दिएं बक्ख-बक्ख थाहें खास करियै पत्नीटॉप ते सनासर ज्नेही बड्डी सैलानी थाहें पर सुरक्षा बंदोबस्त तगड़े करी दित्ते गए न। पुलस अधिकारियें दा आखना ऐ जे सार्वजनिक सुरक्षा यकीनी बनाने ते कनून बवस्था आहली स्थिति बरकरार रखने दे मकसद कन्नै विशेष सुरक्षा दस्ते कायम कीते गए न। सैलानिएं दी आओजाई दे प्रबंधन ते कुसै बी माड़ी घटना गी रोकने दे मकसद कन्नै सुरक्षाबलें दे जवानें दी बाद्दू तैनाती दे कन्नोकन्नी जांच चौकियां स्थापित कीतियां गेइयां न ते गश्त गी होर बधाई दित्ता गेआ ऐ। मकामी लोकें ते सैलानिएं लेई नमें ब'रे दे जश्र गी रमानदारी आहला, बवस्थित ते सुरक्षित बनाने लेई ट्रैफिक नियमन, भीड़ प्रबंधन ते सख्त निगरानी आहले हीलें गी अमल च आहनेआ गेआ ऐ। इस सरबंध्यै च होर जानकारी दिंदे होई रामबन दे एस.एस.पी अरूण गुप्ता होरें दस्सेआ

<><><><><><>

## Roll Ball C'ship

17मीं जूनियर रोल बॉल राश्ट्रीय चैम्पियनशिप अज्ज थमां जम्मू दे एम.ए. स्टेडियम च शुरू होई गई ऐ। उपमुख्यमंत्री सुरिंद्र चौधरी होरें औपचारिक तौरा पर एहदा उद्घाटन कीता। एह प्रतियोगिता पहली जनवरी 2026 तगर चलोग। एहदे च 26 राज्यें ते केन्द्र शासित प्रदेशें दे तकरबीन 600 खडारी ते अधिकारी हिस्सा लै'रदे न। राश्ट्रीय स्तर दे इस आयोजन कन्नै नौजवानें च रोल बॉल गी बढ़ावा मिलग ते खित्ते च खेड्डु संस्कृति होर मजबूत बनग। आयोजकें दा आखना ऐ जे एह चैम्पियनशिप बड्डे खेड्डु आयोजनं दे केन्द्र दे तौर पर जम्मू दी बधदी छवि गी दर्शांदी ऐ।

<><><><><><>

## 2025 The Year of Reform

ब'रा 2025 भारत दी विकास यात्रा च महत्पूर्ण ध्याऽ रेआ ऐ। इस ब'रे केई नीतियें गी हकीकी रूप दित्ता गेआ ऐ। अज्ज अपनी बशेष श्रृंखला सुधारें दे ब'रें च अस तुंदे आस्तै लेइयै आए आं जे किस चाल्ली भारत गी तेजिया कन्नै अगड़े बढने आहले मुख् दे रूपै च चेत्ता कीता जाहग। प्रधानमंत्री नरेंद्र मोदी हुंदी अगुवाई च ओह उस्सलै इक महत्वपूर्ण पल बनी गेआ जिस्सलै भारत नै पराने कनूनें गी छोड़ियै अपने टैक्स ते नियमक ढांचे गी सखल्ला बनाया। इन्ना गै नेई उद्योगें आस्तै नमें बूहे खोले ते शासन गी आत्मविश्वास आहले मुख् दी आसं-मेदें कन्नै जोड़ेआ ऐ। एह इक नेहा बरा रेहा ऐ जिसलै भारत दा आशिक रौंह, वैश्विक महत्वकांक्षा बक्खी लगातार बदाया गेआ। एहदा असर ग्रामीण भारत उद्योग, श्रम बजारें ते भविक्ख गी आकार देने आहले उभरदे खेत्तरें च दिक्खने गी लब्बा। प्रधानमंत्री हुंदे आसेआ 15 अगस्त गी नियामक सुधारें ते 21मीं सदी दे भारत लेई कनूनें गी परतियै तयार करने दी लोड़ दा आह्वान इनें सुधारें च झलकदा ऐ।

## Workshop Samba

साम्बा कृषि मैहकमे आसेआ अज्ज JKCIP ते HADP तैहत जिला सदर दफ्तर च इक रोजा सिखलाई कार्यशाला ते जागरूकता कैंप दा आयोजन कीता गेआ जेदा उद्घाटन HADP दे मिशन डरैक्टर संदीप कुमार होरें कीता। इस मौके पर साम्बा दियां डिप्टी कमिशनर आयूषा सूदन होर बी उत्थे मौजूद हिआं। इस सिखलाई कार्यशाला च करसानें, करसान उत्पादक संगठन यानि FPO, आप सहायता समूहें ते खास करियै महिला करसानें आसेआ नौजवानें गी राईबाई बक्खी प्रेरित करने आस्तै बक्ख-बक्ख सटाल लाए गेदे हे। आकाशवाणी समाचार कन्नै गल्ल करदे होई HADP दे मिशन डरैक्टर संदीप कुमार होरें आखेआ जे बदधी बेरोजगारी पर रोक लानेआस्तै नौजवानें गी राईबाई गी अपनाना लोड़च्चा ऐ। उनें आखेआ

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## Dense Fog

उत्तर भारत दे केई हिस्सें च घनी धुंध करी ब्हाई ते रेल सेवा पर माड़ा असर पवा'रदा ऐ। ऐलवे दे दिल्ली डिविजन मुजब दिल्ली जाने आहिलयां तकरीबन 18 ट्रेनां 3 घैंटें शा मता चिरें चला'रदिआं ना। माड़े मौसम दा असर ब्हाई जात्तराएं पर बी पवा'रदा ऐ। दिल्ली ब्हाई अड्डे दे प्रबंधन मुजब घनी धुंध करी अज्ज 64 डुआरियां रद्द करी दिक्ती गेदियां ना। तोआई, सिविल हवाबाजी सरबन्धी मंत्रालय नै जात्रिएं लेई सलाह जारी करदे होई एह गुजारश कीती ऐ जे ओहू एयरलाइन कंपनिएं दे अधिकारिक संचार चैनलें राहें ताजा जानकारीयां हासल करदे रौहना। एयर इंडिया इंडिगो ते स्पाइसजेट ज्नेही ब्हाई कंपनिएं जात्रिएं गी सलाह दिक्ती ऐ जे ओहू ब्हाई अड्डें लेई रवाना होने शा पैहले अपनी डुआरी दे ताजा स्थिति दी जांच करी लैन। जात्रिएं गी इब्बी आखेआ गेआ ऐ जे ओहू अपनी जात्तरा सरबन्धी योजनां बड़ा दिक्खी सुनियै गै तैयार करना।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## Weather

जम्मू दे पदरे इलाकें च अज्ज घनी धुंध करी आम जनजीवन पर माड़ा असर पेआ ऐ। तोआई, मौसम विभाग नै जम्मू-कश्मीर च कल्लै तगर अद्दे-दुब्बे तौरा पर बढ़ल छाए दे रौहने दी पेशगोई कीती ऐ। 30 दिसम्बर गी किश थ्हारें पर हौली बरखा ते बर्फबारी होने दी मेद ऐ। 31 दिसम्बर ते पैहली जनवरी गी बी केई सारी थाहरें पर हौली बरखा ते खास करी उत्तरी ते मध्य कश्मीर दी उच्चिएं धारें पर बर्फबारी होने दे आसार ना। जम्मू खित्ते दे मैदानी इलाके च घनी थमां दरम्याने दर्जे दी धुंध पौने दी बी खबर ऐ। मौसम दे सूरतेहाल बारै आकाशवाणी समाचार गी जानकारी दिंदे होई मौसम विभाग दे इक अधिकारी नै आखेआ

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

रामबन दे बागवानी ते योजना मैहकमे आसेया जिले दीराजगढ़ थाहर इक जागरुकता कार्यक्रम दा आयोजन कीता गया, जेहदे च करसानें, आप सहायता समूहें, करसान उत्पादक संगठनें ते नौजवानें गी कृषि ते सरबंधत सैक्टरें लेई बक्ख-बक्ख सरकारी स्कीमें बारे जानकारी दिती गई। इस कार्यक्रम च समग्र कृषि विकास कार्यक्रम सनें चीजें गी डब्बा बंद करने सरबंधी बक्ख-बक्ख फ्लैगशिप स्कीमें पर ध्यान केन्द्रित कीता गया। अधिकारियें दा आखना ऐ जे इस चाली दे कार्यक्रम बक्ख-बक्ख स्कीमें दे फायदे बारे लोकें गी जागरुक करने दा सब्बनें शा बेहतर तरीके ना। इस बारे होर जानकारी दिंदे होई रामबन दे एरिया मार्केटिंग अफसर तहसीन इकबाल चिब होरें आखेआ

<><><><><><>

### DLSA-Udhampur

समाज दे हाशिये पर रौहने आहले तबके गी मुफ्त कनूनी सहायता, साक्षरता ते न्याऽ हासल करानेदे कन्नै डिस्ट्रिक्ट जज प्रदीप सिंह बाहू हुंदी अध्यक्षता च जिला कनूनी सेवा प्राधिकरण तैहत उधमपुर च इक बैठक दा आयोजन कीता गेआ। मुख करी ध्यान जिले च 18 साल कोला घट्ट उम्री दे कुड़ियें दे ब्हाह गी रोकने लेई इक खाका तैयार करने पर दिता गेआ। बैठक च कुड़ियें दे स्कूल छोड़ने थमां रोक, सने उन्दे अधिकारें बारे उनेंगी जागरुक बनाने पर चर्चा कीती गई। आकाशवाणी समाचार कन्नै गल्ल करदे होई जिला कनून सेवा प्राधिकरण सचिव सुमति शर्मा होरें आखेआ

<><><><><><>